

TEZAUUR LITURGIC

18 IANUARIE

ACATISTUL SF. ARHIDIACON- MUCENIC NICHIFOR KANTAKUZEN DE LA BREST



MOSCOVA, 2000



Акафист
священномученику
архидиакону Никифору
Кантакузину

Кондак 1

Избранный Богом защитниче веры православныя, благочестиваго Собора Берестейскаго первоседальниче, нечестивых отступников от Святыя Церкви обличителю, похвальная пения приносим ти, священномучениче Никифоре, ты же, яко имеяй дерзновение ко Господу, молитвами твоими укрепи ны в вере и благочестии, да зовем ти: Радуйся, священномучениче отче наш Никифоре, православныя веры поборниче.

Икос 1

Ангелов чини удивишася дивному о тебе смотрению Божию, яко от юности избра ты Господь в служение великое, да вси людие, видяще крепость веры твоя и чистоту душевную, восхвалят тя сице: Радуйся, страны Греческия дивное прозябение; Радуйся, пределов Русских богодарованное посещение.

Радуйся, от юности Господа возлюбивый;
Радуйся, плотская мудрования Дух покоривый.
Радуйся, от душепагубных путей устранившийся;
Радуйся, путем спасения шествовати
устремивыйся.

Радуйся, суеты мира сего обличителю;
Радуйся богоугодного жития устроителю.
Радуйся, священномучениче отче наш
Никифоре, православныя веры поборниче!

Кондак 2

Видяще ближнии твои от младенства в
богомудрии и любомудрии преуспеяние, вдаша
тя к научению книжному, да, припав ко
источником словес Божественных, во умилении
воспоеши Богови: Аллилуиа.

Икос 2

Разум твой напитал еси во странах Италийских,
идеже мнозии сограждане твои в научении
быша, и по некоем времени избраша тя во
ректора училища еллинскаго. Ты же не о чести и
славе прилежал еси, но об устройении
добродетельном души своея и порученных ти.
Темже вси восхвалиша тя:
Радуйся, нечестивых соборищ и богомерзких
обычаев уклонивыйся;
Радуйся, к человекобожию италийскому своим

сердцем не прилепивыйся.
Радуйся, сокровищ Божественных во уме и
сердце стяжателю;
Радуйся, святителем Василию и Григорию во
учении подражателю.
Радуйся, богомудрием своим православных
возвеселивый;
Радуйся, иноверных ритором зело удививый.
Радуйся, яко тебе ради Православие вознесся;
Радуйся, яко тобою всякое самомнение
постыдеса.
Радуйся, священномучениче отче наш
Никифоре, православныя веры поборниче.

Кондак 3

Силу словес твоих, яко дела благими
подтверждена есть, уразумевши святейшая
Патриархия Цареградская, призва тя к
служению в Церкви Велицей, от неверных
порабощенней, да тебе ради прославится имя
Господне хвалебною песнию: Аллилуиа.

Икос 3

Имущи таковаго светильника, возрадовася
Церковь Греческая, леты многия в гонениях и
утеснениях от зловерных агарян пребывавшая.
Ты же, отче Никифоре, не токмо саном
священным почтенный, но и происхождением от

царскаго рода Кантакузенов возвеличенный,
всею душою об устройении церковнем прилежал
еси. Сего ради многажды слышал еси:
Радуйся, Триипостаснаго Бога верный
служителю;

Радуйся, апостолом и святителем соревнителю.

Радуйся, Патриарху Цареградскому Иеремии
неленостный помощниче;

Радуйся, пред магометаны ежедневный веры
Христовой исповедниче.

Радуйся, многия напасти и поругания
претерпевый;

Радуйся, к делу Божию николиже сердцем
охладевый.

Радуйся, прещения мучительскаго не
устрашивыйся;

Радуйся, твердый защитник Святыя Церкви
явивыйся.

Радуйся, священномучениче отче наш
Никифоре, православныя веры поборниче!

Кондак 4

Бурю внутрь имуще помышлений сумнительных
людие православнии во стране Польско-
Литовстей, егда уведаша о замыслех нечестивых
извести Святое Православие и насадити
латинство, обаче, силою Божиею укрепляеми,

воодушевишася противу кознем их, вопиюще Всесильному Богу: Алиллуйа.

Икос 4

Слышаще о добродетельном житии и мудрости многой архидиакона Никифора, известиша братство Львовское и благоверный князь Острожский Церковь Цареградскую о грядущем бедствии на Православие и просиша прислати в помощь сего богоноснаго мужа, глаголюще: Радуйся, священнейший отче, и прииди к нам вскоре;

Радуйся, помощниче наш в постигшем ны горе. Радуйся, светильниче богопросвещенный; Радуйся, саном Патриаршаго Экзарха почтенный.

Радуйся, Соборныя Апостольския Церкви труба многогласная;

Радуйся, лжепастырей и волков гроза ужасная.

Радуйся, яко тобою Православие возвышается;

Радуйся, яко тобою всякая схизма посрамляется.

Радуйся, священномучениче отче наш Никифоре, православныя веры поборниче!

Кондак 5

Боготечней звезде уподобляясь, от Востока в страны Полунощныя востекл еси, отче, да со всеми верными разгониши мрак греховный и да

ничтоже возмогут служителие тьмы противу сынов света, поющих выну: Аллилуиа.

Икос 5

Видев стенания и слезы православных людей земли Валашския, по смерти воеводы Петра в междоусобие вверженныя и насилие от султана турскаго и гетмана польскаго терпящия, пришел еси к ним на помощь, отче Никифоре, и Божиим содействием умирися страна та, и вси восхвалиша тя, ликующе:

Радуйся, треволнений предстательством своим умирителю;

Радуйся, нечестивых и гнусных замыслов разрушителю.

Радуйся, по слову Божию всем благотворивый;

Радуйся, и гетмана польскаго от плена свободивый.

Радуйся, незлобием своим пашу турецкаго уротивый;

Радуйся, свирепство его на милость пременивый.

Радуйся, православныя земли Валашския похваление;

Радуйся, на всяком месте призывающим тя заступление.

Радуйся, священномучениче отче наш Никифоре, православныя веры поборниче!

Кондак 6

Проповедует Церковь Русская сугубыя подвиги и труды твоя, отче священнейший, за Святое Православие zde подъятыя, и вопиет непрестанно во умилении Господеви: Аллилуиа.

Икос 6

Возсиял еси воистину яко звезда путеводная собору благочестивому, во граде Берестейском собранному противу разбойническаго соборища лжепастырей, и явился еси твердый Православия защитник, всем указуя путь ко спасению. Сего ради прими от нас похвалы сия:

Радуйся, догматов веры и преданий святоотеческих ревнителю;

Радуйся, канонов и правил Святыя Церкви блюстителю.

Радуйся, о вразумлении отступников zelo ревновавый;

Радуйся, трикраты на собор их призывавый.

Радуйся, злокозненных учеников Иудиных безстрашно обличивый;

Радуйся, данною ти властью от Церкви их отлучивый.

Радуйся, Эфесскому святителю Марку подражателю;

Радуйся, единого, еже есть на потребу,

стяжателю.

Радуйся, священномучениче отче наш
Никифоре, православныя веры поборниче!

Кондак 7

Хотя беззаконных злодейство явити, да не
обольстят верных отступством своим, слезно
молился еси, отче Никифоре, о знамени свыше
для укрепления малодушных и посрамленных
еретиков, и, получив просимое вскоре, взывал
еси с радостию: Аллилуиа.

Икос 7

Дивное знамение яви Господь по молитвам
святаго Никифора на посрамление еретиков,
егда в соборней церкви святителя Николая
отступницы дерзнуша совершати Божественную
Литургию со еретики, вино в Чаше претворися в
зловонную воду во обличение и наказание их.
Людие же, узревше сие Божие предостережение,
отвергшеся унии, возопиша:
Радуйся, богомудрый Никифоре, нечестивых
посрамителю;
Радуйся, и буди нам ко спасению учителю.
Радуйся, святителю Николаю нравом
подражавый;
Радуйся, силу благодатную от Господа
стяжавый.

Радуйся, яко тобою неправда обличися;
Радуйся, яко тебе ради суд и истина явися.
Радуйся, злочестивыя службы отрешителю;
Радуйся, Божественныя Евхаристии
сослужителю.
Радуйся, священномучениче отче наш
Никифоре, православныя веры поборниче!

Кондак 8

Странно и ужасно бе слышати лжепастырем,
яко Экзарх Никифор не убоися грознаго
повеления краля-мучителя и не бежа от
пределов страны Польско-Литовския, но с
благоговением выну вопиет ангельскую песнь:
Аллилуиа.

Икос 8

Весь явился еси воистину всем помощник,
блаженнейший отче, егда по разсеянии верных
не поколебался еси, но со дерзновением и
властию устремился еси на защиту Церкви
Православныя, устрояя братства, обители и
приходы в пределах, униатами поработченных.
Таковыя ради ревности прими от нас похвалы
сия:
Радуйся, словом и писанием верных
укреплявый;
Радуйся, от униатския клятвы люди

свобождавый.

Радуйся, вдовствующую Митрополию
сохранивый;

Радуйся, ея устроение Господеви вручивый.

Радуйся, обителей благочестивых покровителю;

Радуйся, приходов православных устроителю.

Радуйся, церковным братствам многожды
помогавый;

Радуйся, на подвиг исповедничества всех
призывавый.

Радуйся, священномучениче отче наш
Никифоре, православныя веры поборниче!

Кондак 9

Всякия клеветы и злоречия наполнишася уста
еретическая, желающе погубити тя, отче
Никифоре, ты же с радостию потекл еси на
предлежащий подвиг, поюще: Аллилуиа.

Икос 9

Витии многовещанныя обращаеши на судилище
беззаконное, хотяще осудити тя на смерть яко
преступника и предателя, обаче соборище их,
суеты и лжесвидетельства исполненное,
никакоже возможе ни в чем обличити тя.
Верныя же, слышаще о сем, восхвалиша тя
сице:

Радуйся, во всем Пастыреначальнику Христу

уподобивыйся;

Радуйся, неправеднаго судилища не убоявыйся.

Радуйся, от слуг Иудиных пощады не желавший;

Радуйся, синедрион беззаконный их обличивший.

Радуйся, отвергший измышления новаго Пилата;

Радуйся, яко от твоих словес обезумела его палата.

Радуйся, от латинскаго фарисейства претерпевый;

Радуйся, за Истину живота своего не пожалевый.

Радуйся, священномучениче отче наш Никифоре, православныя веры поборниче!

Кондак 10

Спасти хотяще Экзарха Никифора от судища неправеднаго, послы православныя и вельможи русския на сейме Варшавском просиша представить дело его, да возможно будет принять решение законное. Обаче латинники воспротивишася сему, желающе не правды, а смерти праведнику. Он же, о сем добре ведая, в спокойствии духа глаголаше: Аллилуиа.

Икос 10

Стена и оплот явися ти, отче Никифоре, вера православная, о нюже сокрушися гордыня и

злѡба дѡавольская, и ни в чемже возмогѡша
неправеднии укорити тя. Обаче не отпустиша,
но в темницу всадиша тайно, дондеже новая
обвинения умыслятъ. Таковоѡ терпение твоѡ
похваляюще, восклицаем:
Радуйся, на камени веры житие свое устраивай;
Радуйся, сего ради во искушениях устоявай.
Радуйся, темничное заключение кротко
претерпевай;
Радуйся, во хладной крепости пламенем веры
горевай.
Радуйся, непрестанно восхвалявший Господа в
нощных бдениих;
Радуйся, грозный обличителю неправедных
судей в сонных видениих.
Радуйся, яко имени твоего униаты трепетаху;
Радуйся, убити тя неправедно замысляху.
Радуйся, священномучение отче наш Никифоре,
православныя веры поборниче!

Кондак 11

Пение всеумиленное приносил еси Богови в
крепости Мариенбургстей, идеже умыслиша
уморити тя, отче Никифоре, мучители
неправедныя, ты же неотступно зывал еси
Единице Триипостасней: Аллилуиа.

Икос 11

Светозарный светильник явился еси,
богопросвещенне, Церкви Вселенския, егоже ни
мрак темничный, ни клевета вражеская, ни
время погасити возмогоша. Всеу радовашася
безстыдныя и беззаконныя смерти твоей от
глада и поруганию имени твоего, ибо Господь
прослави тя и дело святое, а их злоумышления и
имена погибоша с шумом. Мы же, вернии, тако
речем ти:
Радуйся, гетмана короннаго от смерти
избавивый;
Радуйся, от него же на смерть предание
приявый.
Радуйся, посрамляющий неправду и козни
униатов;
Радуйся, укоризно малодушию и буйству
Мелетиев и Иоасафатов.
Радуйся, мечем слова Божия нечестивых
посекаяй;
Радуйся, злоречивыя уста их доныне
заграждаяй.
Радуйся, расторгающий козни их яко паучину;
Радуйся, ратоборче безбоязненный за истину.
Радуйся, священномучениче отче наш
Никифоре, православныя веры поборниче!

Кондак 12

Благодать данную ти от Бога добре введуще, отче Никифоре, к заступлению твоему прибегаем, да укрепимся во Святом Православии, единым сердцем и едиными усты восклицающе песнь: Аллилуиа.

Икос 12

Поюще твое прославление, восхваляем Господа, явившаго тя Церкви Своей новаго заступника и молитвенника, во дни сия дарованнаго. Приими от нас сие малое, обаче благодарное пение: Радуйся, Церкви Киевския и Галицкия украшение;

Радуйся, Православия во граде Львове укрепление.

Радуйся, Митрополий Белорусския и Польския
новый предстателю;

Радуйся, благоденствующий силою Божией всякому
твоему почитателю.

Радуйся, землю Берестейскую и Вольнскую
молитвенным защищением покрывающий;

Радуйся, со преподобномучеником Афанасием
Пречистую Богородицу за ны умоляющий.

Радуйся, яко сонм исповедников и мучеников
тобою похваляется;

Радуйся, яко тобою Православие в земли нашей
утверждадется.

Радуйся, священномучениче отче наш
Никифоре, православныя веры поборниче!

Кондак 13

О всехвальный угодниче Божий, Патриарший
Экзарше, священномучениче архидиаконе
Никифоре! Донеси молитвы сия наша ко
престолу Господа Вседержителя, да в ковчезе
спасительном Церкви Христовой сподобимся
безмятежно преплыти житейское море и улучшить
вечное спасение и вместе с тобою воспети:
Аллилуиа.

(Этот кондак читается трижды, затем икос 1 и
кондак 1)

МОЛИТВА

Отче Никифоре, всегдашний за нас пред Богом
ходатаю и ныне Церковию всему миру
явленный! Житием своим ты показал еси любовь
Христову до смерти за други своя и стояние за
Истину даже до крове. Ве мы, яко твоим
предстательством Православная Митрополия
Киево-Литовская сохранися и торжество ея на
соборе Полотстем явися. Обаче грех ради наших
братия наша земли Галицкия ослеплению ныне
предашася и от Церкви уклонишася, и во иных
местех злокозненная посползновения открывшася.

Ведуще, яко в сию годину промыслительно явля Господь новаго молитвенника и предстателя за Святое Православие, взываем ти: умоли Вседержителя Бога соблюсти и сохранить Апостольскую Соборную Церковь невредиму от всяких ересей, нестроений и расколов, наипаче же от ветром колеблемых пастырей и человекоугодников. Укрепи в нас ревность о славе Божией, да всяк во своем звании и чине словесы и дела богоугодными явится истинный последователь Христа Спасителя, и да прославится о сем Всесвятейшее Имя Отца и Сына и Святаго Духа, во веки веков. Аминь.

